

## DOMINGU XXXI TEMPU KOMÚN – TINAN B

### TEMA DOMINGU DA-31 TEMPU KOMÚN NIAN

Liturjia Domingu da-31 Tempu Komún nian dehan mai ita katak domin horik iha sentru esperiénsia sarani nian. Dalan fiar nian, ne'ebé loron ba loron, ita hetan konvite atu la' o tuir, bele habadak iha domin ba Maromak no domin ba maun-alin sira – aspetu rua ne'ebé la esklui malu, maibé kompleta malu.

*Leitura dahuluk* apresenta mai ita inísiu "Shema' Israel" nian – proklamasau solene fiar nian ne'ebé israelita ida-idak tenke halo loroloron. Ne'e mak afirmasau Maromak nia unisidade no konvite ida atu hadomi Maromak ho fuan tomak, ho klamar tomak no ho kbiit tomak.

*Evanjellu* haktuir mai ita, ho forma klara no kestiona-laek, katak esperiénsia fiar Jezús nia eskolante nian, habadak iha domin – domin ba Maromak no domin ba maun-alin sira. Ukun-fuan rua ne'e la bele haketak malu: “hadomi Maromak” katak kumpre ninia vontade no estabelese ho maun-alin sira relasau domin nian, solidariedade nian, partilla nian, servisu nian, to'o don total vida nian. Buat seluk mak esplikasau, dezvoltamentu, aplikasau iha vida prátika kona-ba koordinada fundamentál rua vida sarani nian.

*Leitura daruak* apresenta Jezús Kristu nu'udar amlulik-boot ne'ebé mai iha mundu atu kumpre Aman nia projetu maksoi'k no atu oferese nia moris iha doasau domin nian ba ema sira. Kristu, ho nia obediénsia ba Aman no ho nia saran-an ba ema sira nia di'ak, hatudu mai ita forma di'ak liu atu esprime ita-nia domin ba Maromak.

### LEITURA 1- Dt 6,2-6

#### MENSAJEN

Testu hahú ho ezortasau ida atu “hamta'uk” Na'i no kumpre lei no ukun-fuan hotu (vers. 2-3). Espresau “hamta'uk Na'i” – beibeik iha Testamentu Tuan - husi sorin ida haktuir reverénsia no respeito no, husi sorin seluk obediénsia pronta ba vontade divina, konfiansa ba Maromak ne'ebé la falla, hakribi kritériu rasik iha haraik-an, adezaun inkondisionál ba Maromak nia vontade, aseitasau tomak ba Maromak nia proposta no ukun-fuan sira. Iha perspetiva katekista deuotonomista autór testu ne'e nian, fiar-na'in ideál (ida-ne'ebé “hamta'uk Na'i”), mak ida ne'ebé dispostu atu hakribi autosufisiénsia no la aseita atu buka ksolok dook husi Maromak nia proposta sira; ida-ne'ebé, ho konfiansa total, iha kbiit atu saran an iha Maromak nia liman, aseita ninia indikasau sira, asume Na'i nia ukun-fuan sira nu'udar lurón seguru no loos atu to'o ba moris nakonu. Ba ida-ne'ebé aseita atu moris iha “hamta'uk Na'i nian”, autór promete atu iha moris naresin.

Iha parte daruak ita-nia testu nian (vers. 4-6), ita bele hatene “Shema' Israel” (hakerek nune'e tanba liafuan ebraiku dahuluk iha Dt 6,4: “Rona Israel”). Testu sentrál judaizmu nian, ne'ebé husi kedas sékulu I nia finál, judeu piedozu sira uza atu harohan loroloron, dadeer no loraik. Iha universu judaiku, verbu “rona”, ne'ebé uza iha ne'e, define asau ida iha tempu tolu: “rona: ho tilun, simu “iha fuan”, “nakfilak iha hahalok konkretu” buat ne'ebé rona no simu. “Shema' Israel” hahú ho afirmasau solene Maromak nia unisidade (vers. 4: “Na'i mesak de'it”). Fiar-na'in israelita tenke rona no interioriza realidade ida-ne'e no nia konsekuénsia mak moris tuir. Nune'e hadook husi nia possibilidade adezaun nian ba maromak seluk ka proposta seluk salvasau nian ne'ebé la mai husi Jahwéh.

Hafoin, mai ezijénsia atu hadomi Maromak úniku ne'e ho domin lahó divizaun, domin ida ne'ebé implika ema nia totalidade (vers. 5: “ó sei hadomi Na'i, ó-nia Maromak, ho ó-nia fuan tomak, ho ó-nia klamar tomak, ho ó-nia kbiit tomak”). Domin ne'e, interioriza tiha iha ema nia fuan no klamar, tenke tradús iha observánsia fiél ukun-fuan no lei sira Aliansa nian.

## **SAMU RESPONSORIÁL - Salmu 17**

### **LEITURA 11- Heb 7,23-28**

#### *MENSAJEN*

Prova ida kona-ba Jezús nia superioridade iha saserdósiu maka ninia durasaun rohan-laek, ne'ebé kontrasta ho mudansa kontínua jersaun saserdósiu levítiku nian. Ba autór Surat ba Ebreu sira, multiplisidade no alternánsia sinónimu ho imperfeisaun. Tanba Kristu nia saserdósiu rohan-laek no ninia intersesaun ba Maromak ne'ebé kontínua, Nia aseguira, ho modu definitivu, fiar-na'in nia salvasaun (vers. 23-25).

Autór remata nia reflesaun ho tipu knananuk ida (vers. 26-28), ne'ebé rezume esplikasaun uluk nian no hasa'e Kristu nia saserdósiu nia karakterístika sira. Nia mak amlulik-boot “santu, inosente, sala-laek, haketak husi sala-na'in sira no foti sa'e ba lalehan” (vers. 26), basá pertense ba Maromak santu.

Aleinde ne'e, Nia la presiza ofere se sakrifísiu loroloron ba nia salan rasik no ema seluk nian, tanba oberese An rasik, dala ida no ba nafatin, nu'udar sakrifísiu perfeitu (vers. 27). Nu'udar komkluzau, autór destaka, dala ida tan, kontraste entre orden inperfeita – katak orden Lei no saserdósiu levítiku – no orden perfeita, ne'ebé Maromak promete no realiza iha Jezús amlulik-boot. Iha ida uluk ita hetan ema sira nakonu ho frajilidade no frakeza; iha Jezús, amulik-boot Maromak nia Oan, nia nafatin iha Maromak nia sorin atu interse de permanentemente ba ema sira.

### **ALELUIA - Jo 14,23**

### **EVANJELLU- Mc 12,28-34**

#### *MENSAJEN*

Hodi sita versíkulu dahuluk “Shema' Israel” nian, profisaun boot fiar nian ne'ebé judeu hotu uza atu harohan dadeer no kalan (kf. Dt 6,4-5), Jezús deklara solenemente katak ukun-fuan dahuluk maka domin ba Maromak – domin ida ne'ebé tenke sai totál, lahó divizaun. Hodi hakohak Maromak nia projetu hotu, nia vontade, nia ukun-fuan sira (vers. 30: “ho ó-nia fuan tomak, ho ó-nia neon tomak no ho ó-nia kbiit tomak”). Jezús kompleta kedas ho ukun-fuan daruak, hanesan atu kompleta ida dahuluk: “hadomi ó-nia maluk sira hanesan ó an rasik” (sitasaun ida husi Lv 19,18). Katak: ukun-fuan boot liu hotu mak ukun-fuan domin nian; ukun-fuan fundamentál ne'e konkretiza iha dimensaun rua ne'ebé kompleta malu – domin ba Maromak no domin ba maluk sira.

Orijinalidade sumáriu evanjéliku Lei nian ne'e, la'ós iha ideia hadomi Maromak no maluk sira, ne'ebé Testamentu Tuan koñese di'ak. Hanorin ne'e nia orijinalidade ita hetan iha, husi

sorin ida, hodi hakbesik domin rua ba malu, hodi tau iha paralelu perfektu no, husi sorin seluk, iha faktu katak Jezús simplifika no konsentra revelasaun tomak Maromak nian iha ukun-fuan rua ne'e.

Jezús nia resposta ba eskriba la'ós atu estabeselese jerarkia ríjida ukun-fuan nian; maibé hodi supera pergunta ne'e nia hanoin kloot, nia lori ba nivel kle'an opsau sira ema nian; iha Jezús nia perspetiva la'ós atu define ida-ne'ebé maka ukun-fuan boot liu ka importante liu, maibé hetan ukun-fuan hotu nia abut. No iha Jezús nia perspetiva, abut ne'e hale'u koordinada rua: domin ba Maromak no domin ba maluk sira. Ne'e maka kompromisu relijiozu fiar-na'in sira nian.

Tuir relatu evanjéliku sira, Jezús nunca preokupa demais atu kumpre ritu litúrjiku sira ne'ebé relijiaun judaika propoin, no la moris ho preokupasaun boot atu ofere se don materiál sira ba Maromak. Nia preokupasaan boot maka dixerne Aman nia hakaran no kumpre ho fidelidade no domin. "Hadomi Maromak" iha Jezús nia perspetiva, sai atentu ba Maromak nia projetu no buka konkretiza, iha moris loroloron, Nia planu sira. Ora, iha Jezús nia moris, halo tuir Maromak nia hakaran liuhusi saran-an ida domin nian ba maun-alin sira, totál. Ba Jezús, "hadomi Maromak" katak kumpre Ninia projetu domin nian, ne'ebé konkretiza iha solidariedade, iha parilla, iha servisu, iha don moris nian ba maun-alin sira.

Oinsá tenke hatudu "domin ba maun-alin sira"? Testu ne'e esplika de'it katak tenke "hadomi maluk sira hanesan an rasik". Liafuan sira "hanesan an rasik" la signifika kondisionalizmu ruma, maibé hadomi ho fuan tomak. Maibé iha testu Testamentu Foun seluk, Jezús esplika ba nia eskolante sira katak presiza hadomi funu-balu sira no harohan ba sira ne'ebé duni sira (kf. Mt 5,43-48). Domin ida laho limite, laho sasukat no la distinge entre ema di'ak no ema aat, entre belun no funu-balu. Lucas, bainhira haktuir epizódiu hanesan, ne'ebé Evanjellu ohin apresenta mai ita, aumenta tan istória "samaritanu di'ak", hodi esplika katak "domin ba maun-alin sira" ne'ebé Jezús husu tenke inkondisionál no tenke to'o ba mauk hotu ne'ebé ita hasoru iha dalan sira moris nian, maski nia ema fuik ema leet ka funu-balu ida (kf. Lc 10,25-37).